

## 60. gr.

Hafi forsendur fyrir gerð fjárhagsáætlunar breyst er hreppsnefnd heimilt að endurskoða fjárhagsáætlunina. Slíkar breytingar afgreiðir hreppsnefnd við eina umræðu á hreppsnefndarfundi, enda hafi breytingartillögurnar verið sendar öllum fulltrúum í hreppsnefnd með dag-skrá viðkomandi hreppsnefndarfundar.

## 61. gr.

Til viðbótar árlegri fjárhagsáætlun skal hreppsnefnd semja og fjalla um þriggja ára áætlun um rekstur, framkvæmdir og fjármál hreppsins. Þessi þriggja ára áætlun skal vera rammí um árlegar fjárhagsáætlanir hreppsins. Skal hún unnin og afgreidd af hreppsnefnd innan eins mánaðar frá afgreiðslu árlegrar fjárhagsáætlunar.

## 62. gr.

Strax að lokinni afgreiðslu hreppsnefndarinnar skal senda félagsmálaráðuneytinu fjárhagsáætlun skv. 58. gr. og þriggja ára áætlun skv. 61. gr. Sama á við um endurskoðaða áætlun eða breytta skv. 60. gr.

## 63. gr.

Ársreikningur hreppsins skal fullgerður, endurskoðaður og tilbúinn til afgreiðslu í hreppsnefnd fyrir lok aprílmánaðar.

Hreppsnefndin skal taka til umfjöllunar og afgreiðslu álit, greinargerðir og tillögur endurskoðanda og skoðunarmanna.

Hreppsnefnd skal hafa lokið fullnaðarafgreiðslu ársreikninga sveitarsjóðs, stofnana hreppsins og fyrirtækja hans eigi síðar en 1. júní ár hvert. Sveitarstjóri og hreppsnefndarmenn skulu árita ársreikninginn.

Eintak af ársreikningnum skal senda félagsmálaráðuneytinu og Hagstofu Íslands fyrir 15. júní ár hvert ásamt greinargerð endurskoðanda og skoðunarmanna.

Samþykkt þessi sem hreppsnefnd Tálknafjarðarhrepps hefur sett skv. 10. og 25. gr. sveitarstjórnarlaga nr. 45/1998 staðfestist hér með til að öðlast þegar gildi. Jafnframt fellur úr gildi samþykkt um stjórn og fundarsköp Tálknafjarðarhrepps nr. 399/1996.

*Félagsmálaráðuneytinu, 25. apríl 2001.*

F. h. r.

**Berglind Ásgeirsdóttir.**

*Guðjón Bragason.*

## AUGLÝSING

**um öryggisráðstafanir vegna innflutnings sjávarafurða frá Perú.**

## 1. gr.

Af heilbrigðisástæðum er bannað að flytja inn samlokur, skrápdyr, möttuldyr og sæsnigla frá Perú.

2. gr.

Ákvörðun þessi er tekin á grundvelli 24. gr. laga nr. 55, 10. júní 1998, um meðferð vinnslu og dreifingu sjávarafurða og tekur þegar gildi.

*Sjávarútvegsráðuneytinu, 8. maí 2001.*

F. h. r.

**Arndís Á. Steinþórsdóttir.**

---

*Þórir Skarphéðinsson.*

7. maí 2001

Nr. 378

## SKIPULAGSSKRÁ

### fyrir sjálfseignarstofnunina Sólhvamm.

1. gr.

Félag eldri borgara í Austur-Húnavatnssýslu, sem er fulltrúi alls eldra fólks í sýslunni, stofnar hér með sjálfseignarstofnun um arf Hallgríms Heiðars Steingrímssonar frá Hvammi í Vatnsdal. Sjálfseignarstofnunin heitir Sólhvammur. Heimili og varnarþing hennar er á Blönduósi.

2. gr.

Stofnfé sjálfseignarstofnunarinnar er sá kvaðaarfur, sem Hallgrímur Heiðar Steingrímsson frá Hvammi í Vatnsdal arfleiddi eldri borgara í sýslunni af með þeirri kvöð, að arfurinn renni til kaupa á íbúð á Blönduósi fyrir aldraða. Stofnféð er á stofndegi að upphæð kr. 8.390.277 og skulu kr. 600.000 (sex hundruð þúsund) haldast óskertar að raungildi.

3. gr.

Tilgangur stofnunarinnar er að kaupa íbúð fyrir aldraða á Blönduósi í samræmi við ákvæði gjafarinnar og leigja út til eldri borgara sýslunnar á hóflegu verði til að geta staðið undir rekstri hennar.

4. gr.

Stofnuninni er heimilt að taka við framlögum og gjöfum sem ætlaðar eru til byggingar eða kaupa á íbúðum fyrir aldraða í sýslunni.

5. gr.

Stjórn sjálfseignarstofnunarinnar skal skipuð þremur fulltrúum, sem kosnir eru á aðalfundi Félags eldri borgara í Austur-Húnavatnssýslu, til fjögurra ára í senn. Þá skal og kjósa 1 fulltrúa í stjórnina til vara. Á svipaðan hátt skulu kosnir tveir endurskoðendur.

6. gr.

Nýkjörin stjórn skiptir með sér verkum og kýs sér formann, ritara og varaformann. Skal formaður annast fjárreiður stofnunarinnar. Stjórnin heldur fundi svo oft sem þurfa þykir og ræður meiri hluti atkvæða úrslitum mála á stjórnarfundum.

Meðal verkefna stjórnarinnar er að sjá um kaup og rekstur íbúða fyrir aldraða á Blönduósi. Til greina kemur að stofnunin eignist fleiri en eina íbúð og er það á valdi stjórnarinnar að meta það.